

史料旬刊

第三十九期

清道光朝密奏專號第五

史料知補

卷一百一十五

增補

中華民國二十年六月二十一日出版

史料旬刊第三十九期

編輯所 故宮博物院文獻館

發行所 神武門外發售室

印刷所 京華印書局



價目表		郵費	
每旬一冊	四角	外埠	每期一角
預定半年 十八冊	六角五角	外國	每期二角
預定全年 三十六冊	十二元	本院發寄刊物均交郵局掛號遞送以免遺失	

本市 商務印書館 中華書局
上海 文明書局 世界書局及
天津 其他各大書店均有代售

史料旬刊第三十九期目錄

清道光朝密奏專號第五

(一) 佚名附片 十一—二十五

(二) 諭旨 一—三

(三) 鈔件 一—二〇

清道光朝密奏專號第五

佚名附片

十

再臣三月在京面奉訓諭江西營務緊要總督駐劄較遠尤宜加倍整頓九江贛州兩鎮爲專閫大員總兵施聯科人本老練精力是否尙健長春年力正好辦事能否穩懷留心察看等因臣跪聆欽遵出京後途次會晤督臣陶澍卽經敬謹傳旨一體欽遵抵任以後復留心體察並於巡緝操防各事宜亦隨時加意整飭查九江鎮臣施聯科老成歷練暢悉機宜所轄長江鄱湖一帶實力巡查現由廣信查山閱伍回程臣與接晤見其體氣結實上馬輕便講論營務條分縷晰精力實屬充健贛州鎮臣長春督率嚴明勤求訓練於捕務極爲認真節經臣與咨會密委員弁分赴各山偵緝匪徒其布置悉臻周密南北兩路控制均極得力其餘各標營員亦皆勤慎供職臣於接見及考驗之時均經諭令約束弁兵實力操緝倘有懈弛隨時參處不任稍涉玩縱至臣標左右兩營及南昌城守營弁兵臣先飭副將趙其楨參將李長壽遊擊國勒明阿逐日練習

鎗箭臣復按日輪流考較即遇考拔別營官弁之日亦令隨同角射練鎗恪遵訓示總以準頭爲主如材藝出衆弓馬較優者分別等差記名拔補及獎賞銀牌倘鎗箭無準予限勤習限滿仍屬生疎卽行黜退務期兵歸實用餉不虛糜以仰副聖主整飭戎行諄諄誥誡至意所有遵旨察看鎮臣及整頓營伍緣由臣謹附片具奏再省標及九江贛州兩鎮營伍臣應次第校看因本年秋間督臣陶澍甫經按營查校是以暫緩臨閱一俟督催今屆新漕全數兌竣開行後臣卽由省起程前赴贛州一帶逐加查閱合併陳明伏乞聖鑒謹奏

十一

再藩臬兩司如臣之左右手必得相助爲理方可期政務日有起色現任藩司劉喜海心地正當人亦伉爽有斷制臣與之籌商一切意見均極相洽惟該司性似不甚耐煩遇事疎節闊目浙江當疲敝已極之時非處處精心果力難資整頓人地似不甚相宜現任臬司周開麒人極和平穩當刑名亦頗詳慎第欲其振作有爲督飭各屬綏靖盜賊才力似有未逮臣謹據實在情形直陳於君

父之前又前任杭州府現升河南開歸陳許道楊鉅源臣素不識其人與之相處亦僅月餘然察其人甚奸詐即如清查一案該員爲總理局員其中支離弊混多係該員核定而臣到此旬餘該員即屢次慫恿奏結幸臣未爲所惑嗣經吊核草冊方知其有心欺朦此外尙有一二事無非徇私取巧其人貌樸心譎而才足以濟其惡似不可用臣受恩至深旣明知其非不敢以現已升任他省隱默不言有誤國事謹一併附片密奏伏乞聖鑒謹奏

十二

再查例載武職自參將以上應迴避本籍蓋因職分較大恐不免或徇鄉黨之私該副將陶煜文可取之處正以其能破除情面馭兵方嚴亦由其操持清潔足以服衆故士卒樂爲之用是以臣從前保奏後曾經面奏仰懇聖恩留於隸以備緩急之用上年九月內由遊擊簡擢紫荊關參將卽在本籍該副將年力方富受恩之日正長如蒙俞允臣知該副將必能始終出力報効合併附片密陳伏乞聖鑒謹奏

十三

再臣聞德順即黑崔鹽政任滿回京開設當舖十餘座陳鑑在蘇州廣開當舖其本籍及京中皆有貿易近年運庫官項無存而該員各成鉅富現經破案若任其狡脫似無以爲貪墨者戒據實奏聞恭候欽定附片謹奏

十四

再臣續奉諭旨蔭德布是否得力著該督仍遵前旨查看明確據實覆奏等因欽此臣前奉上諭即以蔭德布現辦雲州回務勦捕能否得宜卜其是否勝任隨摺附陳在案近復詳細察看蔭德布年力方壯資性聰明待將備不煩苛待兵丁不刻扣平日操守體面人無異詞此次督辦雲回經臣責成嚴切勦捕亦甚出力惜其更事日淺尙少威重再得數年摩厲當可應變握奇此時此缺未敢遽云勝任伏念滇省邊要提督首在得人竊見貴州鎮遠鎮總兵新升湖北提督榮玉材老幹嚴明曉暢軍務在黔九載兵畏民懷於滇省情形就近亦多

熟悉可否籲懇天恩准以榮玉材調補雲南提督於邊防營伍均有裨益蔭德布仍留本省酌補總兵俾之歷練老成足備干城之選又騰越鎮總兵李能臣前因赴緬稍遲經臣專摺奏參部議降一級調用臣復遵旨確查其稍遲啓程之由一因騰越兵練正須挑選一因永平回寨適有浮言尙非意存觀望至往雲州勦匪殲擒首要各犯實屬身先士卒勇敢有爲且於回性夷情歷年俱深諳習在滇省武職中洵未易得不揣冒昧仰乞恩施容臣擬結回案時核實奏請開復原官留滇補用以資熟手庶功過兩不相掩勸懲各得其宜臣爲邊備得人起見用敢附片密陳伏乞聖鑒留中謹奏

十五

再查鳳邠道那丹珠性情粗率復喜浮華外官習氣日深不以公事爲重西安府知府貴麟人尙誠實辦事亦勤惟年近七旬精力究難周到以上二員臣前任陝臬卽已深悉其人近復詳加考察均未敢稍存遷就謹密片陳奏請旨飭令回京交吏部帶領引見恭候聖裁謹奏硃批所奏是另有旨

十六

再奴才等前於二月二十一日將奉旨發遣黑龍江嚴加管束之西藏已革諾們罕阿旺札木巴勒楚勒齊木接收管束之處附片具奏於四月初七日奉到硃批知道了再本年發遣黑龍江太監韓喜務當嚴行收禁斷不准致令脫逃何時監斃卽行奏聞欽此旋於是月十三日准總管內務府將太監韓喜咨解前來奴才等當即接收遵旨將太監韓喜鎖錮監禁嚴行稽察毋致疎脫除咨刑部總管內務府備核外理合附片奏聞爲此謹奏

十七

再臣於本年四月附奏變通保甲成式稽查北山游民並各屬拿獲盜匪名數欽奉硃批所辦甚好勉之毋懈欽此臣以奸匪一日不靖善良一日不安節經札司嚴切飭拿自四月至今除命案兇犯不計外復據先後報獲強劫輪姦搶竊拒捕問擬斬絞遣軍流徒各犯一百二十一名軍流逃犯及刀匪一百六十

三名並於盜案究出盜線窩家均經隨時盡法審辦閭閻悉臻靜謐各州縣才具不等自臣就案參撤尙知講求捕務黽勉小心誠能以勸懲懲可期日有起色現查李文瀚馬國翰吳應剛三員獲盜出力均有例得甄叙計隨案聲請與專摺陳奏同一升途然循例保送則視若故常至奉旨特升則羣相感奮蓋無所勸而爲善不可以例中材有所待而後興正可以維積習臣身膺疆寄斷不敢意存見好逾格邀恩而緝捕有關地方獎勵有關緝捕實爲鼓舞人材起見謹再附片縷陳伏乞聖鑒謹奏

十八

再安徽通省知府以鳳陽府爲最繁民風偏於強悍訟獄紛多必須勤幹有爲之員方資治理聞現任知府愛崇阿年逾六旬諸事廢弛雖尙無劣蹟恐於此缺未宜臣既有所聞不敢不據實密陳伏候聖裁謹奏

十九

再涼州鎮總兵長年現年六十九歲精力尙健辦事亦勤惟御下過寬不能任怨涼標弁兵向不能如西寧河州等鎮之勇敢若不時加策勵勢必益致因循查看該鎮難資整頓謹據實附片具奏伏乞皇上聖鑒謹奏

二十

再密查蒙古備兵候調一節奴才伏思蒙古王公世受國恩素著忠盡情殷報効出於真誠我皇上俯念惻怍特允所請然亦祇准其在近口地方駐札聽候調遣並未命其進邊赴防也奴才屢次隨圍目睹蒙古官兵雖驍勇而無紀律不可用之於戰陣蒙古性最畏熱未便令其冒暑進邊迨至秋高氣爽蒙古之士馬騰歡而逆夷亦皆懼寒而遠遁矣是不得於天時也邊外地勢平曠邊內沮洳鹹灘在在皆是蒙古能馳騁於邊外不能施展於邊內是不得於地利也逆夷弄兵海上蒙古素不識水性若令其在陸路埋伏防堵亦斷不能如滿洲官兵之隊伍整齊紀律嚴明或參用滿洲蒙古官兵則素不相習更難望其同袍敵愾以奏膚功是不得於人和也況一經奉調進邊即屬王師戰士所需廩

給馬乾自應與滿洲官兵一體支放既不能得其實力而糜費滋多以國家有限之錢糧充無用之兵餉亦殊可惜奴才受恩深重愚昧之誠偶有所見不敢緘默不言是否可採伏惟聖鑒理合附片密行奏聞謹奏

二十一按原片旨查辦以肅功令事……一行以前約半頁被裁去

旨查辦以肅功令事竊查科場條例內載康熙十八年議准順天鄉試正副主考及同考如暗帶主文假裝僕從隨入內簾者察出將本官交部議處帶進之人治罪等因臣思掄才大典外省事同一律茲聞本年江南鄉試正考官文慶自京帶同湖南舉人熊少牧前往幫看試卷入闈時隨同僕從混入內簾旋值文慶患病凡房官薦卷由內監試分呈文慶者多由熊少牧取中現在回京外間嘖有煩言伏思開科取士關係人才之得失試官奉命衡文責無旁貸江南人數雖多而自入闈以至揭曉爲期一月有餘既有兩主考又有十八房時日既寬分理者衆不比學臣試期匆促必需幕友分勞況去取之間易滋弊竇權衡務當自主豈可假手他人文慶身爲大臣當蒙恩簡放之時如果病體新痊

精神未能周到即當據實陳明另請簡放若竟攜帶私人入闈校閱即使其人誠實可靠於例既屬違礙於心亦覺欺朦又況所帶之人難保其無情弊乎臣既有所聞相應請旨飭查以肅關防而杜弊竇再聞熊少牧現住在正陽門外潘家河沿不難傳訊以得實情臣爲慎重科場起見是否有當伏祈皇上聖鑒
謹奏

二十二

再兩淮鹽務疲弊已久年甚一年幸自淮北改票以來因經辦之海州分司運判童濂不徇請託不稍營私事必親裁務求裕課便民是以勢豪奸蠹無從施其伎倆每年除完課外尙可協貼淮南不致敗壞決裂其淮南綱食各岸商固固利而行官亦惟利是視章程屢易百弊叢生運司被其牽掣鹽政勢成孤立即如上年辦理庚子綱奏銷各該商疲玩性成觀望嘗試經臣飭委候補知府黃冕及該運判童濂馳赴揚州隨同運司沈拱辰督商趕辦不數月而十分全完爲近十數年未有之事又如本年春間前督臣伊里布回任後各該商要求

調劑辛丑新綱應開不開遷延挾制迨聞臣已奉旨赴任始行定期開綱亦不敢瀆請調劑其種種刁疲情形非有深悉弊端才能駕馭之人維持其間敗壞可立而待臣遍查屬員中之熟悉鹽務又能公正不阿爲官商所敬服者惟黃冕童濂二員合無仰懇天恩暫緩簡放他省留於江蘇預備整頓鹽務之計俾臣得收指臂之助臣爲鹽務需人起見不揣冒昧附片密陳伏乞聖鑒謹奏

二十三

再臣行抵廣西省城接見藩司邵甲名留心察看該員安詳穩重尙無外官虛浮之習與之商榷地方公事該員每以職任至重不特錢糧出納必須逐款勾稽即升調委署等事關係人材進退常恐一有錯誤下招物議上負天恩察其言論似屬謹慎小心一路臣復日於公牘中考其行事大抵恪遵成例略無苟且其於屬員公事亦能秉公執法不涉詭隨臣又以該員到粵已閱四月之久聲名賢否外間輿論難誣並即隨時隨事明查暗訪並無異議伏查該員歷任各省其操守辦事如何臣實限於聞識未能周知若就現在耳目所及詳加體

察尙無可指之隙臣凜遵訓諭飭查具有天良斷不敢一字稍涉虛捏至於該員居心行事能否初終一轍臣仍刻加查察隨時具奏不敢因循廻護自干咎戾惟查現署臬司事左江道卞斌係刑部司員出身例案尙能諳習辦理尋常刑名事件不致有誤惟年逾六旬記性不免恍惚公事亦近顛預該員本任左江道管轄南寧太平泗城鎮安等府界連雲貴廣東越南均係極邊重地至爲緊要誠恐將來回任後精神照料未周遇事難期得力臣不敢因其現在尙無貽誤稍事徇隱可否請旨勅部調取引見之處恭候欽定所有臣遵旨查察並察看道員不能得力各緣由謹據實附片密陳伏乞聖鑒謹奏

二十四

再奴才承准軍機大臣字寄欽奉上諭提督余步雲從前效力邊疆尙無貽誤於海洋要地或非所宜難資得力該督如於各省提督內有眞知灼見決其必能殺賊立功或無論何省總兵各員內有堪勝海疆重任者著即據實奏明請旨候朕酌定等因欽此奴才查余步雲從前本係薄有威望之員而自到浙後

一味心懷疑懼其用人亦多存私見以致不能服衆大概由於海疆夷情不能了了身家較重遂有自保之念誠如訓諭海洋要地非其所宜至各省水師提督奴才惟知陳化成寶振彪二人勇敢有爲惟皆現處要地難以更調其陸路提督孰優孰劣奴才並無所聞不敢妄對若各省總兵內奴才知有臺灣鎮總兵達洪阿精明勇敢馭兵有術於海洋情形亦所熟悉實爲總兵中僅見之員倘蒙恩准簡放浙江提督洵於海洋有裨惟現常用兵之際臺灣係屬要地余步雲亦不可使預知調動致更掣肘緣蒙垂詢奴才謹據實密陳恭候採擇伏乞聖鑒謹奏

二十五

再臣過浙江詢及寧紹台道尙開模據撫臣劉韻珂稱其人極正派辦事亦殊勤懇惟該道缺屬繁劇非該員所能勝任現在寧波正當多事即克復定海之後一切更須整頓尤非所長臣以該員曾任福建知府復詢之撫臣吳文鎔所言與劉韻珂相同臣與該員素無交識據兩撫臣意見符合則該員之人地未